

दिनांक : 31.05.2026

समय : 18.45 बजे

- यमुना जल परियोजना रे क्रियान्वयन ने ले र नुवी दिल्ली मांय अहम बैठक व्ही—राजस्थान मांय जल प्रबंधन ने मजबूती मिलेला ।
- जयपुर मांय कोचिंग संस्थानां मांय अग्नि सुरक्षा व्यवस्थावां ने ले र विशेष अभियान चलाया गया ।
- नैफेड रे नीलामी पोर्टल रो शुभारंभ—काश्तकारां सूं सीधी खरीद खातिर जरूरी व्यवस्था तैयार ।
- केन्द्रीय कृषि मंत्री शिवराज सिंह चौहान अलनीनो प्रभाव सूं कम बारिश री आशंका ने देखता थकां आवश्यक कृषि प्रबन्धन उपायां माथे व्यापक दिशा—निर्देश दिया ।

000

यमुना जल परियोजना रे क्रियान्वयन सूं जुड़्या न्यारा—न्यारा पहलुआं माथे आज नुवी दिल्ली मांय बैठक व्ही । केन्द्रीय जलशक्ति मंत्री सी.आर. पाटिल, मुख्यमंत्री भजन लाल शर्मा अर हरियाणा रा मुख्यमंत्री नायब सिंह सैनी परियोजना ने एमओयू सूं जुड़्या न्यारा—न्यारा मुद्दा माथे अंतिम रूप दियो, साथै ही किशाऊ बांध परियोजना माथे भी विचार—विमर्श कर्यो । इण मौके माथे श्री पाटिल कह्यो की यमुना जल परियोजना ने दीर्घकालिक नजरिए रे साथै आगे बधायो जा रियो है । इण रे तैत पाणी ने पाईप लाईन रे माध्यम सूं पहुंचाणे रो प्रस्ताव है । जिण सूं वितरण व्यवस्था चोखी व्हेला । वणा कह्यो की किशाऊ बांध परियोजना रे बारा मांय 6 राज्यां रा मुद्दा रो समाधान व्ह्यो है । बेगो ही एमओयू भी कर्यो जावेला ।

.....

मुख्यमंत्री श्री शर्मा कह्यो की यमुना जल परियोजनावां सूं शेखावाटी खेतर खास है । बेगेऊबेगो इ ने धरातल माथे लायो जावेगा । वठिने श्री सैनी कह्यो की बैठक मांय बरसात रे पाणी ने सहेज र राजस्थान पहुंचाणे ने ले र विचार विमर्श भी कर्यो गयो ।

000

गृहराज्य मंत्री जवाहर सिंह बेढम आज करौली पहुंचया । वणा सर्किट हाउस पांचना संघर्ष समिति रा प्रतिनिधियां रे साथै बणतल करी । संघर्ष समिति रा अध्यक्ष अशोक सिंह धाभाई अर दूजा पंच—पटेलां री उपस्थिति मांय समस्या रे समाधान खातिर विचार—विमर्श कर्यो गयो । इण रे चालता करौली विधायक दर्शन सिंह अर जिला कलेक्टर अक्षय गोदारा भी मौजूद रहया । वठिने पांचना बांध सूं सिंचाई खातिर नहरा मांय पाणी छोडने ने लेर सवाईमाधोपुर जिला रा खण्डीप गांव मांय काश्तकारां रो महापड़ाव आज भी जारी रहयो । वठिने धरणे रे कारणे कुछ बकत ताई रेल यातायात भी प्रभावित रहयो । मौके माथे मोटी तादाद मांय पुलिस बल तैनात है ।

000

जयपुर मांय आज मंत्रिमंडलीय उप—समिति री बैठक व्ही । उपमुख्यमंत्री डॉ. प्रेमचंद बैरवा री अध्यक्षता मांय व्ही इण बैठक मांय प्रदेश रा न्यारा—न्यारा जिलां मांय रियायती दरां माथे जमीन आवंटन रा प्रकरणां माथे विचार—विमर्श कर्यो गयो । बैठक मांय शिक्षा, स्वास्थ्य अर शहरी विकास सूं जुड़्या प्रस्तावां माथे समीक्षा कर सहमति दी गई ।

000

चिकित्सा अर स्वास्थ्य मेहकमां री प्रमुख शासन सचिव गायत्री राठौड़ आज जोधपुर रा उम्मेद सफाखाना रो जायजो कर्यो । वणा प्रसूतावां, चिकित्सकां अर नर्सिंग स्टाफ सूं बणतल कर र उपचार व्यवस्थावां माथे फीडबैक लियो, साथै ही अहलकारां ने चिकित्सा सेवावां ने बत्ती प्रभावी अर

गुणवत्तापूर्ण बणावण खातिर जरूरी दिशा-निर्देश दिया। इण रे पाछे खबरनवीसां सू बणतल मांय श्रीमती राठौड़ कह्यो के हर मरीज ने चोखो अर सुरक्षित ईलात मुहैया करावणो राज्य सरकार री सर्वोच्च प्राथमिकता है। आमजन ने चिकित्सालय सारू भरोसो बणायो राखणो चाहिजे। वणा कह्यो की सगळा साफाखाना मांय मानक चिकित्सा प्रोटोकॉल-एसओपी री पालना पक्की करणे खातिर ज़ोर दियो जा रह्यो है।

.....

ध्यान जोग है कि पावटा सफाखाना मांय सिजेरियन रे पाछे प्रभावित प्रसूतावां रे ईलाज अर सेहत री सतत निगराणी राखी जा री है। ज़िला प्रशासन वाणी स्वास्थ्य स्थिति माथे अपडेट देणे खातिर मेडिकल बुलेटिन जारी करणे रा हुकम दिया है।

000

लखनऊ कोचिंग सेंटर अग्नि काण्ड रे पाछे आज जयपुर मांय फायर सेफ्टी व्यवस्थावां री जांच खातिर खास अभियान चलायो गयो। नगर निगम अर पुलिस री टीमां ने शहर मांय कोचिंग संस्थावां अर लाइब्रेरी रा अग्नि सुरक्षा इंतजामां री जांच करी। इण कार्यवाही मांय 14 कोचिंग संस्थावां अर पुस्तकालयां ने सील कर्यो गयो। साथै ही 24 कोचिंग सेंटरां ने फायर सेफ्टी नियमां री अनुपालना खातिर नोटिस जारी कर्या गया। अभियान रे चालता नगर निगम, पुलिस अर प्रशासन री संयुक्त टीमां ने संस्थानां मांय फायर सेफ्टी उपकरण, आपातकालीन निकास मार्ग अर फायर एनओसी सूं जुड़्या दस्तावेजां री जांच करी।

000

संयुक्त विश्वविद्यालय प्रवेश परीक्षा-सीयूईटी 2026 स्नातक दाखिलां रा नतीजां घोषित कर दिया है। राष्ट्रीय परीक्षा एजेंसी नतीजा जारी करता थकां बतायो की उम्मीदवार सीयूईटी पोर्टल माथे आप रा स्कोर कार्ड देख सके हैं। एनटीए रे मुजब इण बरस मई म्हीना मांय प्रवेश परीक्षा मांय 11 लाख सूं बत्ती पढेसरी भेळा व्ह्या हा।

000

केन्द्रीय सहकारिता मंत्री अमित शाह आज नैफेड रे नीलामी पोर्टल रो नुवी दिल्ली मांय शुभारंभ कर्यो। इण मौके माथे श्री शाह कह्यो की काश्तकारां ने सीधी खरीद खातिर जरूरी व्यवस्था तैयार कर दी गई है। वणा कह्यो की सहकारिता मंत्रालय आवता दो बरसा मांय दलहन री खरीद सीधे काश्तकारां सूं खरीदने रो लगस राख्यो है। वणा किसानां री भागीदारी ने मजबूत करणे खातिर खरीद कामां मांय बिचौलियां री भूमिका ने खत्म करणे रो हेलो कर्यो।

000

केन्द्रीय कृषि मंत्री शिवराज सिंह चौहान अलनीनो प्रभाव सूं बिरखा री आशंका ने देखता थकां फसलां ने सुरक्षित राखणे अर जरूरी कृषि प्रबन्धन उपायां माथे खासा दिशा निर्देश दिया है। अलनीनो संकट रे संभावित असर सूं निपटणे खातिर आज वे कृषि मंत्रियां अर मौसम महकमां रा अहलकारां खातिर उच्च स्तरीय समीक्षा बैठक करी। वणा कह्यो की भारतीय कृषि अनुसंधान परिषद देश रा सगळा जिलां खातिर आकस्मिक योजनावां तैयार कर ली है। केन्द्रीय कृषि मंत्री राज्य सरकारां सूं आ योजनावां ने प्रभावी रूप सूं लागू करणे री अरज करी है, साथै ही वणा वैज्ञानिकां सूं काश्तकारां ने बगत माथे सही सलाह पहुंचाणे री बात कही है।

000

राज्य मांय आज कुछ एक ठौड़ा माथे प्री मॉनसून गतिविधियां रो असर देखण ने मिल्यो। सीकर अर करौली मांय दोपहरां पाछे मौसम बदल्यो अर तेज हवावां रे साथै धूळ रो गुबार छाग्यो। साथै ही बूदा-बांदी व्ही। वठिने, श्रीगंगानगर जिला रा सूरतगढ़, राजियासर अर दूजा केई इलाकां मांय तेज हवावां साथे बरसात व्ही। भरतपुर मांय भी धूलभरी आंधी चाळी, इण रे पाछे केई देर हल्की बिरखा व्ही। बीकानेर, जैसलमेर अर फलोदी समेत आसे-पासे रा खेतारां मांय व्ही हवावां रे साथे बादळा री

आवाजाही देखण ने मिली। मौसम मेहकमां रा मुजब आ सात जिला मांय आंधी, बारिश रो ऑरेंज, वठिने 12 जिलां मांय येलों अलर्ट जारी कर्यो गयो है। 27 जून ताई जोधपुर, कोटा अर उदयपुर संभाग मांय कठेई-कठेई गरज-चमक रे साथै हल्की बिरखा व्हे सके है। इण रे चालता केई जगवां माथे पर झौंकेदार हवावां चालणे रा भी आसार है। दक्षिण राजस्थान मांय बरसात री गतिविधियां मांय कमी देखी जा सके है।

000

भारतीय जनसंघ रा संस्थापक डॉ. श्यामा प्रसाद मुखर्जी री पुण्यतिथि माथे प्रधानमंत्री नरेन्द्र मोदी समेत दूजा केई नेतावां वां ने श्रिद्धाजंलि अर्पित करी। सोशल मीडिया पोस्ट मांय श्री मोदी लिख्यो की महान विभूति डॉ. मुखर्जी रा प्रखर विचार अर आदर्श हर पीढ़ी ने मातृ भूमि री सेवा खातिर प्रेरित करता रहवेला। मुख्यमंत्री भजन लाल शर्मा भी आप रे निवास माथे डॉ. मुखर्जी रा फोटो माथे फूल चढ़ा र वां ने नमन कर्यो। मुख्यमंत्री कह्यो की डॉ. मुखर्जी रो त्याग अर राष्ट्र प्रथम रो संकल्प देश सेवा रे मार्ग माथे चालणे खातिर प्रेरित करतो रहवेला। केन्द्रीय पर्यटन मंत्री गजेन्द्र सिंह शेखावत आज भरतपुर मांय डॉ. श्यामा प्रसाद मुखर्जी के बलिदान दिवस माथे राखीज्या कार्यक्रम मांय भाग लियो। इण मौके श्री शेखावत कह्यो कि वणा आप रो सगळो जीवन सेवा खातिर समर्पित कर्यो।

000

कोटपूतली खेतर रा बनार गांव रे कने आज एक सड़क हादसा मांय एक मिनख अर टाबरी री मौत व्हे गयी। हादसो तेज रफ्तार डंपर री चपेट मांय आणे सूं व्हयो। घटना रे पाछे खेतर मांय शोक की लरह दोड़ गयी।

000

युवा मामला अर खेल मंत्री डॉ. मनसुख मांडविया कह्यो की कि भारत अभूतपूर्व खेल क्रांति रो साक्षी बण रियो है। सोशल मीडिया पोस्ट मांय आज अंतर्राष्ट्रीय ओलंपिक दिवस माथे आप रे संदेश मांय डॉ. मांडविया कह्यो की देश री खेल क्रांति खिलाड़ियां ने सशक्त बणा री है अर हर नागरिक ने खेलां ने जीवन शैली रे रूप मांय अपणावण खातिर बधावो दे री है। वणा कह्यो की देश उत्कृष्टता, मित्रता अर सम्मान रे ओलंपिक मूल्यां रो जश्न मना रियो है, जको दुनियाभर मांय लाखो लोगां ने प्रेरित करे है।

000

प्रधानमंत्री राष्ट्रीय बाल पुरस्कार-2026 खातिर 31 जुलाई ताई आवेदन कर्या जा सके है। सगळो नामांकन ऑनलाइन लिया जा रिया है। अ पुरस्कार 15 सूं 18 वर्ष आयु वर्ग रा टाबरां रे असाधारण, साहस अर सृजनात्मकता ने समर्पित है। आं ने 6 श्रेणियां मांय दिया जावे है। राष्ट्रपति कानी सूं अ पुरस्कार हर बरस नुवी दिल्ली मांय आयोजित खास जळसा मांय प्रदान कर्या जावे। जळसा मांय आयोजन वीर बाल दिवस रे मौके माथे 26 दिसम्बर ने कर्यो जावे है।

000